



SIMULACIJSKA OBUKA ZA AKTERE UKLJUČENE U BORBU PROTIV TRGOVINE LJUDIMA U BOSNI I HERCEGOVINI

Sarajevo, 17. – 21. februar 2025. godine

Trgovina ljudima, moderni oblik ropstva, složeno je i višedimenzionalno krivično djelo koje predstavlja teško kršenje ljudskih prava i oduzimanje ljudskog dostojanstva. Ona pogađa sve države članice OSCE-a i često ima prekogranične efekte, te stoga zahtijeva međunarodnu, domaću i regionalnu saradnju. Trgovina ljudima ne bira spol, starost, rasu, ni religiju svojih žrtava. Države članice OSCE-a obavezale su se da će preduzeti mjere za prevenciju trgovine ljudima, krivično goniti počiniocima i zaštititi žrtve. Organizacija za sigurnost i saradnju u Evropi (OSCE) podržava države članice pružajući pomoć u ispunjavanju njihovih obaveza i izradi učinkovitih politika rada u oblasti borbe protiv trgovine ljudima.



U ovom kontekstu, Misija OSCE-a u Bosni i Hercegovini, u saradnji sa Uredom specijalnog predstavnika i koordinatora OSCE-a za borbu protiv trgovine ljudima, organizovala je prvu simulacijsku obuku u oblasti trgovine ljudima u Bosni i Hercegovini (BiH). Ova je obuka provedena u okviru vanbudžetskog projekta pod nazivom **Simulacijska obuka domaćih struktura za borbu protiv trgovine ljudima u Bosni i Hercegovini** koji finansira Delegacija SAD-a pri OSCE-u.

Petodnevna praktična obuka okupila je učesnike iz različitih sektora angažujući ih u realističnim simuliranim scenarijima sa više aktera, omogućavajući im da iz prve ruke iskuse složenost i izazove odgovora na slučajeve trgovine ljudima u stvarnom životu. Cilj obuke je bio da se unaprijedi razumijevanje učesnika o dinamici trgovine ljudima; ojača pristup u čijem su središtu žrtve i koji je zasnovan na poštivanju ljudskih prava i znanju o traumi; potakne međugencijska i međuinstitucionalna saradnja i koordinacija te unaprijede kapaciteti za identifikaciju i pružanje adekvatne pomoći žrtvama. Osim toga, obuka je imala za cilj unapređenje kapaciteta učesnika da efikasno odgovore

na različite oblike trgovine ljudima primjenom principa borbe protiv trgovine ljudima u svom svakodnevnom radu.

Kako bi se osigurala relevantnost obuke, grupa eksperata pripremila je simulacijske vježbe koje reflektiraju trenutnu situaciju u oblasti trgovine ljudima i migracija u BiH. Predstavnici iz oba entiteta, Federacije BiH (FBiH) i Republike Srpske (RS) pristustvovali su obuci. Na obuci je učestvovalo ukupno 112 domaćih i međunarodnih polaznika. Grupa učesnika od 56 članova podijeljena je u timove na osnovu njihovih zanimanja, koja su obuhvatala službenike za provođenje zakona, tužioce, inspektore rada, psihologe, pravnike, prevodioce, socijalne radnike i predstavnike civilnog društva. Učesnici su blisko sarađivali na koordiniranju poslova, potičući saradnju između institucija i lokacija. Na primjer, službenici Granične policije BiH radili su sa službenicima s kojima nisu ranije radili, unapređujući međugencijsku saradnju.

Vježbu su podržavali i nadgledali ključni akteri. Antene – 17 eksperata za borbu protiv trgovine ljudima – pratili su aktivnosti i izvještavali Direx, tim sastavljen od 9

profesionalaca odgovornih za vođenje obuke. Dvanaest učesnika simuliralo je žrtve, osumnjičene i prevodioce, dok je 12 domaćih i stranih posmatrača ocjenjivalo vježbu. Pored toga, 6 učesnika pružalo je logističku pomoć.

Saradnjom u multidisciplinarnim timovima na istrazi simuliranih slučajeva, prikupljanju i osiguravanju dokaza, vođenju koordiniranih intervjua sa žrtvama i počiniocima te izvođenju akcija spašavanja i hapšenja, učesnici su stekli nova znanja i vještine. Simulacijska vježba ukazala je na oblasti koje zahtijevaju unaprijeđenje kao i na prilike za dalji napredak.

Ključne prepreke su bile jezičke i kulturne barijere u kontaktu sa žrtvama, nedostatak komunikacije između različitih službi i sukob nadležnosti. U cjelini, obuka je unaprijedila strategije i prakse u identifikaciji i odgovoru na slučajeve trgovine ljudima. Zahvaljujući ovom principu „učenja kroz praksu“, učesnici su unaprijedili svoje vještine u realističnom i kontroliranom okruženju, osposobljavajući ih da nova znanja i vještine primjenjuju i integiraju u svoje svakodnevne napore u borbi protiv trgovine ljudima.



Pratite OSCE



Misija OSCE-a u Bosni i Hercegovini
Fra Anđela Zvizdovića 1, UNITIC toranj A
71000 Sarajevo
Bosna i Hercegovina

Telefon: +387 33 952 100
Faks: +387 33 442 479
press.ba@osce.org
www.osce.org/bih
@oscebih